

**Nzryr-krbz Pol Krali Mz Lr  
Korint  
Natq Ngr Nzaplxtqngr Mz  
Nzryr-krbz Pol Krali Mz Lr  
Korint**

Mzli kc tqmncngr Aposol Pol mz taon Efisz, yrbzle ‘Nzryr-krbz Pol Kx Ayrnrngr Mz Lr Korint.’ Mz letz lc, rpile kx Timoti sa naoklatile nidr x mz nibrde nayzlu-mop bade. ✧ Opx angidr kx Timoti pibzle mz Pol kx kzdung aposol kxnalvztr-rbrng kcng tzprtrng mz lr Korint nzbatrpzlr badr nzrlxngiti-krdr kx Pol trngiu aposol angidr. Zbz Pol oklatile nidr mzli kxpipz kx trmrlz-etr-ngru drtwrdr, x nzycmne-krbzle badr pqtx zlwz. ✧ Zbz sc tqyzlupe mou Efisz x pnzpe drtwrde nzatwzlr-krbzle Taetus badr, mz nzokatr-krde nztekqtr-krdr nqm q nr drtwrdr. X kzdung mzli mz nibrde, rlaszle taon kc Efisz, x rmctile Taetus mz Masedonia Provins, mz nyzlu-krbzle bade, mwz mz taon kc Filipae. ✧ Mzli lcde, yiz esz' mz nibr ‘Nzryr-krbz Pol Kx Ayrnrngr Mz Lr Korint,’ yrbzle letz lc, mwz mz mzlr yiz 55—56 AD mz nibr nzrmcng m z Jisz. X Taetus twzbzle letz lc mz lr Korint. ✧ Zbz sc tqoklatipe Pol nidr mz nzwrde kratq. X mz nzmnc-krde kc mz Korint, yrbzle ‘Nzryr-krbz Pol Mz Lr Rom.’

Mz letz lc, awi-ngrbz Pol mz Gct lr Korint

---

✧ : 1 Korint 16:10-11 ✧ : 2 Korint 2:1; 12:14; 13:1-2 ✧ : 2 Korint 2:12-13; 7:5-16 ✧ : 2 Korint 8:16-24

kcng tzteqtrlr nqm̄ nr drtwrdr, x rlx̄tibzle  
mz krkcng tzxpqbrlr-ngrdr nide kx natekqtr-  
kzlr nqm̄ nr drtwrdr. Pibzle badr da kqlu mz  
nzaelwapx-krde kx nide aposol angidr.

### **Mrkcng Mz Letz Lc**

Gct amqtr-zvzle drtwr kxnzrlxngiting. [1:3-11]  
Pol ayz̄lubzle natq leplz kcng t̄zrpilr kx da kcng  
t̄qpile pokia-ngrde. [1:12—2:4]

Lr Korint naipqlr k̄ztedrng kcng tzteqtrlr  
nqm̄ nr drtwrdr mz alwx ngrdrng. [2:5-13]  
Kxnzrlxngiting nzaovxio-zvzlr Setzn mz  
nzaxvctr-krbzlr mz Kxnzmcp̄x. [2:14-17]

Pol nide angidr aposol murde nqm̄ kr lr  
Korint mrlz. [3:1-6]

Nzesz'tikr Drtwr Gct Kxmrna badr leplz ne-  
deng myaszpx-zlwzle krkc kai mz Lou Sc  
Mosis. [3:7-18]

Kxmu nqm̄ kr Pol mz nzwz-krde. [4:1—6:13]  
Nimu kxnzrlxngiting b̄zkq axvctr-lzbq̄bzmu  
mz k̄xtrnzrlxngitiung. [6:14—7:4]

Taetus rlwa-ngrbzle mz Pol nrpa ngr lr Korint  
kxnzrlxngiting. [7:5-16]

Nzatak̄tilr trau mz nzwzkr lrmak̄xtr. [8—9]  
Pol ayz̄lubzle natq leplz kcng t̄zpibq̄tilr nide.  
[10—12]

Pol lc-apq-mopwzle mz leplz kcng t̄zrpwa'-  
ngrbzlr nzwz-krde. [13:1-10]

Pol pibzle natq ngr nzarlr-lzbq̄ngr. [13:11-14]

<sup>1</sup> Ninge Pol kc tqk̄le Jiszs Kxnzmcp̄x mz  
nzngini-krnge aposol nede mz nzvz-nq̄blq̄-krde  
me pnz drtwr Gct. Nigr n̄cdr mzlegu Timoti  
rpibzkr bamu kx, “Nimu la!” Ryrbo bamu, nimu

lr makxtr ne Gct kx nzmncng mz taon kxetu Korint, x kxnzrlxngiting kc-kzng mz provins kc Akaia. \*

<sup>2</sup> Krka'-ngrne kx Trtegu Gct x Kxetu rgu Jiszs Kxnmcpx nakabzlr bamu zmrlz ngrdr kxmyalz x nzmnc-zpwxngr.

### *Gct Amqtr-zvzmle Drtwrgu*

<sup>3</sup> Naglqlzku Gct x na-awi-ngrbzku bade, mz nzngini-krde Trte Jiszs Kxnmcpx, Kxetu rgu. Murde yc zvz mz drtwrde nigu x amqtr-zvzmle drtwrgu. <sup>4</sup> Mz nzapqtr-zvz-krmle lc drtwrgu

mz nzkxpu-krqu, krlz-kzku nzapqtr-ngrbz drtwr kztegunng mz nzkxpu-krdrng, mz nzvz-nqblq-krde nqm q kr Gct mz nzapqtr-krmle drtwrgu.

<sup>5</sup> Leplz nzaetq-zvzbzlr drtqgu mz nzaxvctr-krbzku mz Jiszs Kxnmcpx, da kc tqwai nzaetq-zvz-krbzlr drtqde. A' mzli lcpwz, apqtr-zvzm Gct drtwrgu, da kc tqwai nzapqtr-zvz-krbzle drtwr Jiszs.

<sup>6</sup> Mz nzm-krde lcde, kxmule-esz' drtqgr nzaetq, nigr aposol, o drtwrgr nzapqtrpqng, a' da lcng li ngi dalr nzokatrngr nimu. Murde nzetqkr drtqgr okatrle nigr mz nzapqtr-krbzkr drtwrmu mz nzetqkr drtqmu.

X mz nzapqtr-krm Gct drtwrgr mzli lc tqtrka, okatrle nimu mz nztu-amqngi-zvz-krmu mz nzbrtikr drtwrmu nide, kxmule-esz' drtqmu etq, da kc tqwaikr mz nzetqkr drtqgr. <sup>7</sup> X lxngiti-angidrkr kx natu-amqngi-kzamu, murde mz nzprtr-krmu mz nzetqkr drtqgu, nigu kxnzrlxngiting, sa naprtr-kzamu mz nzapqtr-krm Gct drtwrgr.

---

\* **1:1** Korint nide taon kxmyapxbz mz Akaia Provins, mz nzngini-krde mzteadau ngrde. Mzli ka provins lc yc mz kandre kc Gris.

8-9 Mzlangeng x inwengeng, nakrlz-angidramu kx mzli kc tqmnc-ngrgr mz provins kc Esia, leplz nzaetq-zlwzbzlr drtqgr. X nzxplr-krgr trtak-itrdeu nztu-amqngi-krgr mz nzxpu-krgr lcng. X mz drtwrgr, ycpe pipz nzbz-krgr. A' Gct rlr-ngrmle da lcng, murde bzkq brti drtwrgr nzxplr-krgr esz'-krgr, a' nabrti drtwrgr nide kc tqat-ulzmle leplz mz nzbzngr mz zmatq ngrde. <sup>10</sup> Zbz mzli lc, Gct sc tqarlapxpele nigr mz nzbzngr. X abrtxtrpwzkr drtwrgr bade mz nzarlapx-zvz-krde nigr mz da kznikeng naprtzmqng bagr kalr. <sup>11</sup> Murde mnc-xgle-kzkr nzprtr-krbzmu mz kztegunng mrkang kqlu mz nzkrka'-krbzmu mz Gct nzokatr-krde nigr. X mz nzayzlu-krbzle nzkrka'-krmu, nimu kxnzkqlung sa na-awi-ngrbzmu bade zmrlz ngrde kx avzomle bagr. ☆

### *Pol Ayzlubzle Natq Leplz Kcng Tzrpilr Kx Da Kcng Tqpile Pokia-ngrde*

<sup>12</sup> Krlz-angidrx mz nabznge kx nqm q krnge mz nzmnc-krgr badr leplz mrlz x tubq, myapxbz mz nzmnc-krgr. X abrtzlvzx da lc. Murde trvzpxpuu mz nzyrplapxkr leplz, a' vzpxm mz zmrlz ngr Gct kc tqokatrle ninge. <sup>13</sup> Pibo da lc murde suti drtwrnge kx nakrlzamu kx da amrlx kcng tqyrbo bamu mz letz scngeng nzopx-angidrng x tryrlq-kapqwxu drtwr ngrdr. <sup>14</sup> Krlzmle mzli ka, kzdung nimu trnzkrz-zpwxkalr kx nzmnc-krgr badr mrlz x tubq zvz, a' ycpe pipz nimu amrlx nzbrtikr drtwrmu ninge. X mzli kc nayzlu-ngrm

Kxetu rgu Jiszs, sa naglqpx-lzbq-ngrnamu ninge, da kc tqwai nzglqpx-lzbq-krnge nimu mzli ka. †

<sup>15-16</sup> Mzli lc tqryr-ngrbo bamu, lxngitix kx amatqamu ninge, x pibo bamu kx nzoklati-krbo nimu nzwrde nali, mzli kc mz nzvz-krnge mz Masedonia Provins, x mzli kc nayzlu-ngrmc. Murde suti drtwrnge kx naokatramu ninge mz nzvzne-krnge Judiz Provins. X nzm na-alepex da lc, natwzpeamu da kxmrlz mz nzwrde lcong li, murde mz nzamrlz-krmu ninge, Gct sa na-amrlz-kzle nimu. <sup>17</sup> Kxmule-esz', a' mz nibrde tekqtrx drtwrnge. A' trngiu drtwr ngrde kx nzymne-krnge ycmne-abeane. Murde mz nztekqtr-krnge drtwrnge, trvz-nqblqwxu da kx mrlzm bange, da kc tzwai kxtrnzrlxngitiung, a' vz-nqblqx me pnz drtwr Gct. Trpnzngr nzpokia-krnge mz nzrpi-krnge da kx na-alex. <sup>18</sup> Da kc tqwaiamu mz nzbrtipekr drtwrmu Gct nzatutrkrde natqdeng, takitrde nzbrti-kzkr drtwrmu ninge, murde trpnzngr nzrpi-krbo bamu kx, "Eu" x "Trtingr" mz mzli kcpwz. <sup>19</sup> Murde vz-nqblqzvzx Jiszs Kxnmcp, Mrlx Gct, x nigr badr Saelas x Timoti yapwxtipxbzkr nide bamu. X Jiszs trpnzngr nzrpi-krmle bagu kx, "Eu" x "Trtingr" mz mzli lcpwz, a' atutr-zvzle natq Gct mz nzmncrde. <sup>20</sup> Mz nzwzkr Jiszs, Gct sa tqatutr-zvzle da amrlx kx esalz-ngrbzle mz leplz nedeng. X

---

† **1:14** Mzli kc Gct naobqtr-ngrde mz nqm qrgu kalr, takitx-trpwzle nzglqpx-lzbq-krngu mz leplz kcng tqokatrku mz nzvz-nqblq-krdr Jiszs. Nzmu lr Korint nzokatr lr Pol mz nzkrka'-krdr nide, takitrde nzglqpx-lzbq-krdr mz nzngini-krde kxrmailz kxmrlz. X Gct sa na-amrlzle nidr mz nzokatr-krdr nide. A' nzm napxtpx-ngrdr nide, trnatwzlru nzamrlzkr Gct lc nidr.

mz nzkrzlz-krngu da lc, glqlzku Gct mz nzrpi-krbzku bade kx, “Eu, da zpwxtx kx atutr-zvzq nzesalz-krmqng.” <sup>21</sup> Sc tqamqngi Gct nzrlxngiti-krngu mz nzaxvctr-krbzle nigu mz Kxnmcpx. X mcpx-kzle nigu. <sup>22</sup> X avzomle Mqngrkxtr mz nzmncpx-krmle mz nabzgu, murde nangingide rxx kx nigu leplz neng Gct kcng natwzlr da amrlx kcng tqesalz-ngrmle bagu.

<sup>23</sup> X ni-kzde Gct kx krlzle kx trpokiawxu. A' tekqtrx drtwrnge mz nzoklati-krbo nimu nzwrde krali, murde ma tqpnanati-moux nimu mz alwx ngrmung. <sup>24</sup> Bzkq rpiamu kx suti drtwrnge nzmnclz-krmamu bange mz da amrlx. A' da kx suti txpwz drtwrnge nzwz-lxblr-krngu murde na-abrtzamu mz Kraes. X krlzx kx tu-amqngiamu mz nzrlxngiti-krmu. †

## 2

<sup>1</sup> Aoti zvz drtwrnge nzoklati-krbo nimu. A' pnz drtwrnge kx mrlz trnzoklati-krpou nimu mzli lc, murde ma tqbatrpo nzvzkr drtwrmu. <sup>2</sup> Murde mz nzbatr-krbo nzvzkr drtwrmu mz nzpnanati-krnge nimu, drtwrnge vz kz. X trpnzng r kx na-aelalzmle drtwrnge. <sup>3</sup> Mz nzmukrde lcde, yrbo letz lc bamu mz nzpnanati-krnge nimu, murde natekqtramu nqm q nr drtwrmu

---

† **1:24** 1:19 Ncblo kc tqngi menrpa na-ale-zvzle da kx na-abrtzlvzng r kxetu rde nide, murde ma tzobqszo leplz badr kxetu rde. 1:22 Nzrlxngiti-krngu x nzwz-krngu kc tqaprcm Gct bagu nztuong mz nzxpkr Gct, a' trngiu mz nzxpkr-krngu esz'-krngu. 1:23 Pol pnanati-kaile nidr mz letz, murde namnc-zpwxng badr mzli kc tqoklati-ngrde nidr.

x sc tqoklati-atebo nimu. Krlzpex kx mz nzvz-nqblq-krmu natqnge lcng, dekc na-abrtzlvz-ngrne nqmq krmu x na-abrtzlvz-kz-ngrnamu ninge. <sup>4</sup> Drtwrnge talvzo x yrni-kzx mzli lc tqyr-ngrbo letz lc bamu, murde alwx ngrmung x nqmq nr drtwrmu abaomle nabznge. Ryrbo bamu murde nakrlzamu kx mrlzti-zlwzx nimu, a' trngiu mz nzbatr-krbo nzvzkr drtwrmu.

*Kztemung Kcng Tztekqtrlr Nqmq Ngr Drtwrdr Mz Alwx Ngrdrng*

<sup>5</sup> Mz letz kc pnz, pibo bamu kx na-ayrplapxamu ncblo kc tqbatrpzle nzcxpungr lcng. Trmrlzu nzrpi-krnge kx alwx rde etu zlwz, a' nzatrkatikrde nimu myaszpxle nzatrkatikrde ninge. <sup>6</sup> Murde mzli ka tekqtrpele nqmq nr drtwrde. X nzayrplapx-krmu nide nayrkrpx. \* <sup>7</sup> Bzkq yc zvz mz drtwrmu alwx rde, a' namrlztrpzmu drtwrde, murde nabzde ma tq-talvzo zvz x sc tqyrlqpx-lzbqpe-ngrde mz nzl-xngitingr. <sup>8</sup> Mz nzmu-krde lcde, rngidrlvz-ngrbo bamu kx mrlx lc nakrlz-angidrlle kx mrlzti-mouamu nide x suti drtwrmu nzprtr-mou-krde mz nzodutr-lxblr-krmu badr. <sup>9</sup> Pnanati-ngrne nimu kz mz letz lc, mz nzobqtr-krnge kxmu nzvz-nqblq-krmu natq kx kapxbo bamu kx namnc-zpwxt-ngrbzmu mz Gct. <sup>10</sup> Vz-nqblqpeamu

---

\* **2:6** Mwx ncblo lcpwz dekc tqyapwxtipx Pol mz 1 Korint 5:1-5. Mz nzayrplapxkr lrmakxtr nide, nzmaszlrpx-ngrdr nide mz makxtr x ma nyzdr x trnzrlr-ngrpwzlrzru nzprtr-krde mz Nzmungrkxtr. X nzkatxpxlr nide mz nzaclvekr Gct nide, mz nzaprc-krbzlr nide mz mq Setzn, murde natekqtrle nqmq nr drtwrde mz nzplzpx-krde alwx ngrde.

natqngeng mz nzayrplapx-krmu nide. X sc tqkrlz pex kx sa navz-nqblq-kzamu natqngeng mz nzipq-krmu nide. X mz nzipq-krmu nide, ipq-kzx nide. Kxnmcpx krlzle kx ipqpex nide mz nzatrkatikrde ninge, murde ma tqrpwa'ngrne nzaodu-mou-krmu nide. <sup>11</sup> Mrlz nzalekrgu da lc, murde ma tqkabzku mz Setzn zmatq ngr nzatrkatikrde nigu murde pxtpx-ngrgu nzipq-krgu mzlegu lc. Krlz-zpwsku kx Setzn vz zvz nzyrlq-krde drtwr ngr nzatrkatikrde nigu kxnzrlxngiting. †

<sup>12</sup> Atwzlr-ngrbo Taetus mz nzka-krbzle letz scenge bamu. X kzdung mzli mz nibrde, rlaszx taon kc Efiszs mz nzvz-krnge mztea Troas mz nzyapwxtipx-krbo Nrpakxmrlz badr, murde narmctix Taetus mrlcde mz nzyzlu-krmle bange. ✧ Mzli kc tqkrlz-ngrbo mrlc, kxmule-esz' leplz lcng nasuti drtwrdr nzxlr-krdr Nrpa ngr Jiszsz, <sup>13</sup> a' sc tqkx zlwx mz drtqng nimu, murde Taetus trkrlzkaple Troas. X mzli kxpipzne mnckr badr kxnzrlxngiti-ateng kcng mrlc, x sc tqrlaszpex nidr. X sc tqvz pex Masedonia provins mz nzmcti-krnge Taetus.

### *Kxnzrlxngiting Nzaovxio-zvzlr Setzn Mz*

---

† **2:11** Kzdung mzli zyagox prtzbzle mz doa kx pxtpx-ngrde nzipq-krde leplz. ✧ **2:12** Aposol 16:8



*Nzaxvctr-krbzlr Mz Kxnzmcp̄x †*

<sup>14</sup> Sa naycmnetr-mou-ngrne da lc mz nibrde. A' mzli ka awi-ngrbo mz Gct kx kxmule-esz' da kx prtzm bange, a' aovxiox Setzn mz nzaxvctr-krbo mz Kxnzmcp̄x kc tqaovxiopole nide. X Gct okatrlle ninge mz nzyapwxtipx-krnge Nrpa ngr Kxnzmcp̄x drlve keng vzkix. X Nrpakxmrlz lc apule zskapu ngr bqlr nc ninz kx mnrtte mrlz zlwz kc tqlvabqtile mrkang kqlu. <sup>15-16</sup> Mz drtwr Gct mnrtte mrlz zlwz, murde abrtzlvzle nzyapwxtipx-krnge nrpa lc. X mz drtwr leplz kcng sa narlapxng, mnrtq nrpa lc mrlz zlwz kz mz nzxlr-krdrle, murde mailzle nidr mz nzlungr kxboi. A' leplz kcng sa naprtrng mz Hxl, nzpxtxpx-ngrdr nzxlr-krdr Nrpa ngr Jiszs, murde mz drtwrdr nrpa lc brtu apule namz kxmibi. X mz nzpxtxpx-krdr nrpa ngr nzlungr, nzprtrng mz nzbz-alongr. Trpnzngr kx takitrde nzyapwxtipx-krde nrpa lc mz nzxplr-krde esz'-krde. <sup>17</sup> Kzdung ncblo nzyapwxtipxlr nrpa ngr Gct, murde nartwz-ngrdr da kx nakabz leplz kcng tzabrtz-ngrdr nzalvztr-krdrng. A' nigr badr kztengeng trapukru nidr, murde nzryapwx-krgr trnartwz-ngrgru da kx nakamamu. A' mz nzwztr-krbzkr mz Jiszs Kxnzmcp̄x, krlzkr kx Gct obqom bagr, x yapwxtipx-zpwxkr nrpa kc tqaprcmle bagr.

---

† **2:13** Mz 2 Korint 7:5 Pol ycmnetr-mou-ngrde nzvz-krde Masedonia Provins x nzmcti-krde Taetus. A' mz ngalrde lng dcpx mz drtwrde kx kxmule-esz' kxne drtqde Taetus, a' Setzn trpnzngr nzatrkatikrde nide. X Pol abrtzlvzle nzaovxio-krde Setzn. Murde kxmule-esz' trxplrkuu, a' zmatq ngr Gct mz zmrlz ngde kxmyalz okatrlle nigu mz nzaovxio-krgru Setzn x alwx.

### 3

#### *Pol Nide Angidr Aposol Murde Nqm̄q Kr Lr Korint Mrlz*

<sup>1</sup> Bzkq rp̄iamu kx glqpx-lzbq-ngrne nzym-nengr lc. Trapukru kxnzetur̄g kcng tzrtwz-zvzm letz murde suti drtwrdr kx leplz nakrlzlr kx nzalvztr-krdr̄ng tubq. Murde krlzpeamu nigr x nzwz-krgr. X tr-rlxti-kzp̄wzkru bamu nzryr-krmu letz mz nzokatr-krmu nigr. <sup>2-3</sup> Murde nimu esz'-krmu apuamu letz kx yr Kxnzmcp̄x mz nzaelwapx-krbzle mz leplz kx wztrp̄zkr mz Gct. Murde trmrbrtru mz drtwrgr kx mzli kc tqyapwxtip̄x-ngrbzkr Nrpakxmrlz bamu, Jisz̄s tekqtrle nabzmu. X alele da lc mz nzwzkr Mq̄ngrkxtr kc tqatwzlr-ngr̄m Gct kxlu zvz. X opx-angidr̄bz mz leplz amrlx kcng tzkrlzlr nimu, kx atwzlr-kz-ngr̄m Gct nigr x nzalvztr-krgr tubq. Murde trapuwamuu letz kc tzlztr mz rplz, a' apuamu letz kxlu, murde nqm̄q nr nabzmu x nzmnc-krmu tubq. ☆ <sup>4</sup> Nzycmne-krbo kxmule lc murde brti drtwrgr kx Gct wz mz nabzmu mz nzaxvctr-krbzmu mz Kxnzmcp̄x.

<sup>5</sup> Krlz-angidrkr kx trpnz̄ngr scgr zmatq esz'-krgr mz nztekqtr-krgr nabz leplz. A' zmatq ngr Gct txp̄wz kx tekqtrle nabzdr mz nzvzpx-krmle mz nzwz-krgr. <sup>6</sup> Murde nide kc tqokatrle nigr mz nzyapwxtip̄x-krbzkr nrpa ngr Nzesz'tikr Drtwr Gct Kc Ate badr leplz kcng tqarlapxpele, mz nzabrtr-krbzlr drtwrdr mz Jisz̄s Kxnzmcp̄x. Mz Nzesz'tikr Drtwr Kc Kai tqyrlqle mz Lou sc Mosis, leplz nanibqng mz nzxpqbrlr-krdr lou lcng. A'

---

☆ **3:2-3** Jeremaea 31:33; Esikel 11:19-20; 36:26-27

mz Nzesz'tikr Drtwr lc Tqate, leplz nalung mz zmatq ngr Mqngrkxtr.

*Nzesz'tikr Drtwr Gct Kc Ate Myaszpx-zlwzle Krkc Kai Mz Lou Sc Mosis*

<sup>7</sup> Krlzku kx lou lc mrlz tqrpilc kx leplz kxn-zaleng alwx nabzng. Murde mzli kc Gct tqka-ngrbzle Loukxtr mz Mosis nzlztrng mz rplz kx nzmelxng, zluli r Gct sc tqayzlrpxpe-ngrde mz Mosis. A' lr Israel nzmwxlrtilr zmatq lc x nzpctxpx-ngrdr nzobq-krbzlr mz mzte. Delc tqakqlvztrngr Mosis mzte mz lrpz. A' zyzlr ngr mzte lc krlzle nzvzneo-krde. <sup>8</sup> Delc, opx angidr kx nzmrlzkr Nzesz'tikr Drtwr Kc Ate tqyrlq Gct mz nzka-krbzle Mqngrkxtr mz leplz, myapx-zlwzbz mz Nzesz'tikr Drtwr Kc Kai. Murde mz Krkc Kai ayzlr-ngrbzle mz Mosis, a' mz Krlc Tqate prtrku mz zluli r Gct. <sup>9</sup> X krlz-kzku kx Lou sc Mosis lc mrlz tqaelwapx-ngrbzle mz leplz kx takitrde Gct nzayrplapx-krde nidr. X opx angidr kz kx nzmrlzkr Nzesz'tikr Drtwr Kc Ate myapx-esz'ngr murde Jiszs atubqtile leplz kxnzlxngitilr nide mz nzobqkr Gct. <sup>10</sup> X mzli ka, nzm na-arsakrlr-ngrgu nzmrlzkr Nzesz'tikr Drtwr Kc Ate mz Lou sc Mosis, opxm kx Lou lc trpengr nzmrlz-krde, murde Krkc Tqate mrlz-esz'ngr. <sup>11</sup> X mou, krlz-kzku kx Lou lc mrlz, kxmule-esz' nayrkrpxpe. X opx angidr kz kx nzmrlzkr Nzesz'tikr Drtwr Kc Ate, myatpx-zlwzbz mz Krkc Kai, murde yc alo.

<sup>12</sup> Mz nzm-krde lcde, nelzgr br mz nzryapwx-pxng, murde krlzkr kx nrpa scgr lc tqyc zvz, a' nrpa sc Mosis nayrkrpxpe. <sup>13</sup> A' trapukru

Mosis kc tqakqlvzle nyzlrxpxkr mzte, murde lr Israel ma tzmclr nzvzneo-krde. <sup>14-16</sup> Mzli lcde, batrpz Gct nzmqngikr nardr, x nardr trpnzngr nzyrplatitr-krdr drtwr ngr natqdeng, krlzmle mzli ka. Murde mzli kc lr Jiu tzrlwx-ngrdr Nzesz'tikr Drtwr Kc Kai mz Nzryrngrkxtr Kc Kai, trtwzlru drtwr ngrde, murde kzdq kc da akamrbr-ngrbzle nzaokrdr drtwrdr, da kc tqwaibzle mz kxtrngiulrjiu. A' mzli kc leplz tzabrtr-ngrbzlr drtwrdr mz Kxetu Jiszs, Mqngrkxtr okatrle nidr mz nzrkatz-krde da kx akamrbr-ngrbzle nzaokrdr drtwrdr. <sup>17</sup> Murde tqngi Mqngr Kxetu rgu kc tqwz mz nzbzgu. X Mqngrkxtr lc aopxbzle drtqgu murde trnamnczpepwwzkuu mz zmatq ngr Lou sc Mosis x alwx. <sup>18</sup> X mzli ka, nigu amrlx keng tzrlxngiting krlzku nzmrlzkr nqm q kr Kxetu Jiszs, murde trpengr da kx akamrbr-ngrbzle nqm q nr drtwrgu. X mz nzaotikr drtwrgu Kxnzmcp, Nzryrngrkxtr apule dzpq, kc tqaelwapx-ngrmle mqngrde bagu. X Mqngrkxtr tekqtr-ebir-ngrde nigu, mz nzapu-krgr Jiszs. X nzaelwapx-krgr nzmrlzkr nqm q krde sc tqetunepx vz.

## 4

### *Nqm q Krgu Nzaelwapx-ngrdr Kx Gct Mncpxm Bagu*

<sup>1</sup> Trpnzngr nztalvzokr nabzgr mz nzyapwxtipx-krgr Nrpakxmrlz, murde Gct yc vz mz drtwrde nigr x okatrle nigr. <sup>2</sup> X nqm q krgr tubq mz da amrlz murde yrlqpx-lzbqgr mz da kx myangr drtq. X da amrlx kx alekr takitrde

leplz nzmckrdrleng. Tresabrtikru leplz murde nalalztqmng bagr o naokatrnr nigr. X trpnzngnr nztekqtr-krgr nrpa ngr Gct. A' yapwxtipx-zpwxkr nrpa angidr, murde krlzkr kx Gct sa tqobqom bagr. X krlz-kzkr kx leplz kxntubqng sa namclr kx nzalvztr-krgrng tubq. <sup>3-4</sup> A' mzli lcpwz, Setzn, kc tqaclvele nrlc, ayrputrpzle drtwr kzdung leplz, murde ma tztwzlr drtwr ngr Nrpakxmrlz. Leplz lcng sa naprtrng mz Hxl, murde trnzkrzlru kx Jiszs Kxnmcpx myapx-esz'ngr mz nzaotr-angidr-krde Gct. <sup>5</sup> X Jiszs Kxnmcpx lc tqyapwxtipxkr mz nzngini-krde Kxetu kc tqaclve-zvzle leplz amrlx. A' trycmnetr-ngrgru nigr esz'-krgr, a' ngi txpwz mz nzrpi-krgr kx kqle Jiszs nigr mz nzwztr-krbzkr bamu. <sup>6</sup> Mzli kc tqwzngnr Gct nrlc, rpile kx, "ZyZlr nayzlrpx-ngrm mz nzlo." ☆ Mz nqm q lcpwz, Gct katxde da kx akamrbr-ngrbzle nqm q nr drtwrgu, mz nzayzlrpx-krmle nzalvztrngr angidr mz drtwrgu, murde nargu nayrplatitrlr drtwr ngr nrpa ngrde. X mzli ka mz nzkrzpe-krgru Jiszs Kxnmcpx x nqm q krdeng, nakrlz-kzku kx nqm q kr Gct mrlz-esz'ngr.

<sup>7</sup> Krlzkr nzmrlzkr nqm q kr Kxetu Jiszs x nzyapwxtipx-krgr da lc ngi da kxbrngz-esz'ngr. X kxmule-esz' nigr leplz txneng x nrkrdrtqgr yangrng, mz nzapu-krdr dis kx mrglc ani, a' Gct aprcmle nzwzngnr lc bagr. Alele da lc mz nzaelwapx-krde kx zmatq ngr Nrpa ngr Jiszs mz nztekqtr-krde leplz, trvzpxpuu mz zmatq ngrgr esz'-krgr mz nzyapwxtipx-krgrle, a' vzpxm mz Gct. <sup>8</sup> Dekc nzxpungnr kxkqlu tqprtzngrmlr

---

☆ 4:6 Nou 1:3

bagr, a' trnzaovxiolru nigr. X nzwrde kqlu kx nabzgr talvzo-ngrdeng, a' drtwrgr trmau. <sup>9</sup> Nzaetq zvz drtqgr, a' Gct mnc-zvzm bagr. Nzwrde kqlu kx nztz-ngrgr, a' trbzkr. <sup>10</sup> Drive keng vzkikr, prtrkr mz nzatrkingr kcng pwz tqprtzbz mz Jiszs. X rlrpx-lzbqgr mz nzbz-krgr, da kc tqwaile, murde leplz nakrlzlr kx zmatq kcpwz tqalu-moule Jiszs, dekc tqwz mz nabzgr x nrkrdrtqgr. ✧ <sup>11</sup> Mz nzwztr-krbzkr mz Jiszs mz nzlu-krgr, Gct sc tqrlr-ngrmle bagr nzprtr-krdr mz da kxkqlu kx nabatrpzle nzbz-krgr. Murde suti drtwrde kx leplz nakrlzlr kx Jiszs lupe mou x zmatq ngrde dekc tqwz mz nrkrdrtqgr kxyan-grnga mz nzokatr-krde nigr mz nztu-amqngi-krgr kxmule-esz' da kx prtz. <sup>12</sup> Delc tqrlrpx-lzbq-ngrgr mz nzbzngr murde naprtramu mz nzlungr kxboi.

<sup>13</sup> Apukr ncblo kc tqrpile kx, “*Pipxx murde abrtrpo drtwrnge mz Yawe.*” ✧ Murde pipx-zvz-kzkr nrpa ngrde mz nzabrtr-krbzkr drtwrgr bade. <sup>14</sup> X krlzkr kx nide kc tqatulz-mople Kxetu Jiszs mz nzbzngr. X kxmule-esz' nznibqgr, a' mz nzaxvctr-krbzku mz Jiszs, sa na-atulz-kz-mople nigu mz nzlungr kxboi, x sa navzmile nigu mz nzmncr-krbzku bade Heven. <sup>15</sup> Da lcng amrlx tzprtzmqng bagr ngi dalr nzokatrngr nimu x leplz kc-kzng tqalvztrkr. Murde mz nzkqlunepxkr leplz kcng tzlxngitilr nzmrlzkr Nrpa ngr Jiszs, nzawi-krbzlr mz Gct x nzangio-krdr nide naetunepx kz.

---

✧ **4:10** Matiu 16:24-25; Mak 8:34-35; Luk 9:23-24; Rom 8:17; 2 Korint 1:5; Filipae 3:10; 1 Pita 4:13 ✧ **4:13** Sam 116:10

<sup>16</sup> Delc nabzgr trtalvzou mz nzwztr-krbzkzr mz Gct. Murde kxmule-esz' nrkrdrdtqgu vztrpem, a' Gct sc tqaxplr-zvzle nabzgu mz zbzq kang kqlu. <sup>17</sup> Mz nzobqtipx-krgru nzetukr da kxmrlzting amrlx kx natwz-aloku Heven, nzaetq-krmlr drtqgu mz nrlc ka topwz, x mzli rde mrbcnepwz. <sup>18</sup> Mz nzmu-krde lcde, traotiu drtwrgr da kx prtzm mz nrlc ka, murde sa nayrkrpxng. A' aoti txpwz drtwrgr da kx naprtzm Heven murde sa naye-along.

## 5

<sup>1</sup> Nrkrdrdtqgu mz nrlc ka nzapulr matelq, murde sa nabzng. A' krlzku kx Gct sa naka-mople bagu nrkrdrdtqgu Heven kx na-apulr ma kx tu-amngi murde trnzbzung. <sup>2</sup> X mz nzmnc-krgru mz mzliir nzxpxng mzm nrlc ka, batrple bagu nzsuti-zlwzkr drtwrgu nztwz-mou-krgru nrkrdrdtq lcngr kx trpnzngr nzxpx-krdr. <sup>3</sup> Murde mz nzbzkr nrkrdrdtqgu mz nrlc ka, mqngrgu sa narmctilr me namnc-ngdrdr mzli kc natwzpe-mou-ngrgu nrkrdrdtq lcngr. <sup>4</sup> A' mz nzmncbe-krgru mz nrkrdrdtq lcngr tr-rblxu nzbz-krdr, yrni-zvz-ngrgu zvetq. X mzli lcpwz, trsutiu drtwrgu nzbz-krgru, a' suti drtwrgu kx nrkrdrdtqgu lcngr nalrtipxng mzm nrkrdrdtq kx tretqu, murde sa nalu-along. <sup>5</sup> Gct yrlq-pnzle drtwr kx sa naka-mople bagu nrkrdrdtq lcngr kalr. X batrple bagu nzsutikr drtwrgu nrkrdrdtq lcngr. X amncpxmle Mqngkrxtr mzm nabzgu nangi rkk kx sa na-atutrlr nzesalz-krdeng.

<sup>6-7</sup> Delc krlzku kx sa natwzku nrkrdrdtq kzbleng lcngr kalr. X brti drtwrgu kx Gct sa na-atutrlr

nzesalz-krdeng amrlx, kxmule-esz' trmckaku. X trpnzngnr nzprmitr-krgr nrkrdrdqgu lcng tr-rblxu nzbz-krdr Heven. Mz nzmukrde lcde, obqtipxku nzyrlqtxo-krgr nrkrdrdq mz nrlc ka, mz nzvz-krbzku mz Kxetu Heven, kc tqngi mrnyzgu angidr.

<sup>8</sup> X trmwxlrtikru nzbzngnr, murde mz drtwrgr nzmncr-krbzku mz Kxetu Heven myaszpxle nzmnc-krgr mrka. <sup>9</sup> Kxmule-esz' mnckr mz nrkrdrdq mz nrlc ka o yrlqtxokrng mz nzvztr-krgr Heven, a' da kx myapxbz mz drtwrgr nzaelalz-krmgr drtwr Kxetu mz da amrlx. <sup>10</sup> Murde mzli kc nigu amrlx kxnzrlxngiting natutr-ngrbzku mz mz Kxnzmcpx kalr, sa na-ayzlumle da bagu mz nzvz-nqblq-krde da kx alekung mz nrlc ka, kxmule-esz' mrlz o trka. \*

<sup>11</sup> Mz nzmyatitr-krgr Gct, dekc tqabz-ngrgr nzngi-batr-krbzkr bamu nzkrlz-krmu kx nqm qkrgr mrlz x takitrde nzmncz-krmamu bange mz nzngini-krnge aposol x mz nzlxngiti-krmu nrpa angidr. Gct krlzle kx nqm qkrgr mrlz x kqlele nigr mz nzwzngnr lc. X lxngitix kx krlz-kzamu da lc mz nabzmu. <sup>12</sup> Mz nzymnengr lc trglqpx-lzbq-ngrgru. A' ngi dalr nzayzlu-krbzmu natq leplz kcng tzatkatilr nqm qkrgr, mz nzrpi-krbzmu badr kx abrtzlvzamu nigr. Murde leplz lcng nzglqpx-lzbqng mz da kx nzmc leplz, a' traotiu drtwrdr nqm qkrgr nr nabzdr. <sup>13</sup> Kxmule-esz' nzrpilr ngqngukr, a' nzngqngu-krgr ngi dalr

---

\* **5:10** Kxnzrlxngiting kcng tzaleng da kxmrlz sa natwzlr da kxmrlzting, a' krkeng trnzaleung da kxmrlz trpnzngnr da kx natwzlr, a' nangi txpwx nzlungr kxboi. [Sam 62:12]



nzaelalz-krmgr drtwr Gct, murde wztrpzkr bade. X mz nzrpi-angidr-krbzkr da bamu ngi dalr nzokatr-krgr nimu. <sup>14</sup> Murde nivz lr KxnzmcpX mailzle nigr mz da amrlx kx alekr. Murde mz nivz lrde, bz-ngrde leplz amrlx. Delc nigu leplz nedeng prtrku mz nzbz-krde. ☆ <sup>15</sup> X mz nzbz-krde leplz amrlx, atulz-mop Gct nide mz nzbzngr. Murde suti drtwr Gct kx leplz kcng tzprtrng mz nzlungr kxboi mz nzlxngiti-krdr Jiszs bzkq nzvz-nqblqpelr me pnz drtwrdr esz'-krdr, a' navz-nqblq-alzulr me pnz drtwrde.

<sup>16</sup> Mz nzmukrde lcde, mzli ka nzaolvz-krgr leplz trpengr nzvz-nqblq-krde drtwr kxtrnzrlxngitiung, a' nzaolvz-krgr nidr navz-nqblqle drtwr KxnzmcpX. Mzli kc tr-rlxngitika-ngrgr, aolvzkr Kraes mz nzvz-nqblq-krde drtwr kxtrnzrlxngitiung. A' mzli ka krlz-angidrpekr nide. <sup>17</sup> Leplz amrlx kcng tzabrtrpzlr drtwrdr mz KxnzmcpX nztekqtr-atwrnrpe-ngrng. Murde Gct tekqtrle nqmQ krdrng kxblzlongr kxtrka mz nqmQ kzbleng kxmrlz. <sup>18-19</sup> Sc tqale Gct da lc, murde Jiszs KxnzmcpX bz-ngrde nigu badr leplz amrlx mz nrlc. X dekc tqyzlumi-mop Gct nigu mz nzmnc-zpwx-krgru badr. X aprcmle bagr nzwzngr mz nzyapwxtipx-krbzkr da lc. Rpibzkr badr kx Gct sa tqipqpx-zvzle alwx ngr krkcng tzplzpxbzlr alwx ngrdr bade mz nzabrtr-krbzlr drtwrdr mz KxnzmcpX kc tqbz-ngrde nidr. Murde Gct suti drtwrde namnc-zpwx-moung badr.

<sup>20</sup> X nigr menrpa neng KxnzmcpX murde

---

☆ **5:14** Galesia 2:20; 1 Timoti 2:6; 4:10; Rom 6:3-11

pipxbzkr natqdeng mz leplz. Apule Gct yrnititr-pzle bamu, mz nzrpi-krbzkr bamu kx, “Natekq-tramu nqm̄q nr drtwrmu, murde namnc-zpwx-mouamu badr mz nrw̄x.” <sup>21</sup> Kraes tubq murde trpnzngr alwx ngrde. ✧ A' Gct rlr-ngrbzle bade nzayrplapxngr nide mz nzxpe-krde alwx rgung amrlx, murde natubq-kzku mz nzobqkr Gct mz nzaxvctr-lzbq-krbzku mz Kraes. ✧

## 6

<sup>1</sup> Prtrpeamu mz zmrlz ngr Gct kxmyalz mz nzarlapx-krde lc nimu. X mz nzwz-lxblr-krgr badr Gct, rngidrlvz-ngrbzkr bamu kx bzq̄q ma mz drtwrmu zmrlz lc, a' rlr-ngrbzmu bade nzokatr-krde nimu nzrvz-nq̄blq̄ngr nide. <sup>2</sup> Rpi pnz Gct mz Nzryrngrkxtr kx, “*Mz mzli kx mrlzm bange, sa na-ayzlu-ngrbo da kx rlx̄timamu bange, murde naokatr̄x nimu mz mzli r nzarlapxngr.*” ✧ Nakrlzamu kx mzli ka, mzli kx mrlzpebz mz Gct mz nzarlapx-krde leplz, murde sc tq̄atwzlrpe-ngr̄mle Mevalu Kxnzmcp̄x mz nr̄lc, x suti drtwrde kx na-abrtrpzmu drtwrmu bade mzli ka.

### *Nqm̄q Kr Leplz Kcng Tzwztrpzng Mz Gct*

<sup>3</sup> Nigr badr kztengeng trpnzngr nzale-krgr da kx nabatr̄pzle mz leplz nzp̄tx̄p̄x-krdr nzxlr-krdr Nrpakxmrlz. <sup>4</sup> X̄ aelwapx-ngrgr kx wztr-angidrbzkr mz Gct, murde tu-amq̄ngikr mzli kc tq̄pr̄tr-ngrgr mz nzaetq̄ngr dr̄tq̄gr, nz̄k̄xp̄u-krgr, nzvztx-zlwzkr drtwrgr, <sup>5</sup> nziklat̄ingr nigr,

---

✧ **5:21** Hibru 4:15; 7:26; 1 Pita 2:22; 1 Jon 3:5 ✧ **5:21** Asaea 53:6; Rom 3:21-26 ✧ **6:2** Asaea 49:8

nzadwatrngr nigr mz presin, x nztutilz-lzbqkr zbo ngr leplz kcng tzrmaneuting nigr murde nanibqlr nigr. X vz zvz nzbtrtkr drtwrgr Gct mzli kc tqwz-kato-zvz-ngrgr, trmwikru, x nelzgr brtale zvz. <sup>6</sup> Suti drtwrgr kx Gct na-abrtzlvzle nigr mz da amrlx. Mz nzmukrde lcde, nzmnc-krgr tubq, krlzkr nzmrlzkr nqm q krdeng, x drtwrgr trngya-anipwzu mz leplz, a' okatrkr nidr mz nivz angidr mz zmatq ngr Mqngrkxtr. <sup>7</sup> Alvztr-ngrgr Nrpa ngr Kxnmcpz mz zmatq ngr Gct x mz natq angidrng. X nztubq-krgr apule toki r vea mz mqgrng. Murde rblxbz mz leplz nzatrkatikrdr Nrpakxmrlz mz nzipx-krdr kx nqm q krgr trka. X krlzkr nzaovxiongr leplz amrlx kcng tzrpilr narpa'-ngrdr nzvzpxkr Nrpa lc. <sup>8</sup> Wztr-angidrbzkr mz Gct kxmule-esz' nzglqpx leplz nigr o nzpdxpx-ngrdr nigr, kxmule-esz' nzabrtzlvzlr nigr o nzipbqtilr nigr, x kxmule-esz' nzrpilr nigr kxnpokiang, a' yapwxti-zvzkr da angidr. <sup>9</sup> Kzdung leplz nzkrizlr kx wztrpzkr mz Gct, a' kzdu-kzng leplz nzpdxpx-ngrdr nigr. Nzayrplatipxlr nigr x nzrpilr nanibqtilr nigr, a' trbzkr. <sup>10</sup> Nzavtibzlr drtwrgr, a' drtwrgr elalz-ngrmle Kxetu rgr. Kxmule-esz' trpnzng scgr da, a' prtr-kzkr mz da kxmrlzting amrlx kx kam Gct bagr mz nzaxvctr-krbzkr mz Kxnmcpz. X okatrkr leplz mz nziprtr-kz-krbzlr bade.

<sup>11</sup> Mzlengeng x inwengeng lr Korint, aelwapx-ngrbzkr bamu kx mrlzti-zlwzkr nimu x trpnzng da kx yrlq-kapqbzkr bamu mz nzipx-krbzkr bamu nivz kx yc mz nabzgr. <sup>12</sup> X trpnzng me lolvz-moukr mz nivz lc. A' trka-atwrn-ngrpwa'muu nabzmu bagr, mz nzmrlzti-kz-krmu

nigr. <sup>13</sup> Apuamu doa nengeng. X pibo da lc mz nzapu-krbo bamu trtemu. Takitxtrde nzayzlu-kz-krpwzmu nivz lc bange.

### *Bzkq Axvctr-lzbqzbmu Mz Kxtrnzrlxngitiung*

<sup>14</sup> Bzkq axvctr-lzbqzbmu mz kxtrnzrlxngitiung, mz nzmncz-krbzmu badr mz nzwzngr o mz nzyrlz-krbzmu badr, murde ma tqprtrkzamu mz alwx ngrdrng. Murde leplz kxnztubqng kcng tzvz-nqblqlr nqm q kr Gct trtakitrdeu nzaxvctr-lzbq-krbzlr mz kxdrka'-ngrng kcng tzvz-nqblqlr nqm q kr Setzn. Da kc tqwai zyzlr x nzlo trnzkrzlru nzyctr-lxblr-krdr me esz'. <sup>15</sup> Trpnzngnr nzesz'tikr drtwr mz Kxnm-cpx x Setzn. Mz nzmu-krde lcde, trpnz-kzngr nzesz'tikr drtwr kxnzrlxngiting badr kxtrnzrlxngitiung mz da kxtubq. <sup>16</sup> ?Myx kxmule, takitrde mqngr drka' kxnzlr nztupx-krmleng Mangr-nzangiongr Yawe? Bzkqtx pnz! Mz nqm q lcpwz, trtakitrdeu nigu kxnzrlxngiting nzaxvctr-lzbq-krbzku mz kxtrnzrlxngitiung. Murde nigu Mrkc Tqtr nyz Gct mz nzmncpx-krmle elr. Rpile mz Nzryrngkxtr kx, “*Sa namncpxmc mz leplz nengeng x mz mz lirdr. Sa nanginibo Gct rdr, x nanginidr leplz nengeng.*” ☆ <sup>17</sup> Dekc tqrpi-kzle kx, “*Prsrpxamu kxdrka'ngr lcng, x akipx-lzbqmu badr, murde ma tqbatrpzle trnztakitr-krdeu nimu mz nzprtr-krmu mz nzangiongr.*” ☆ Aleamu da lc x sa na-abrtzlvzx nimu.” ☆ <sup>18</sup> X rpi kz Yawe kc

---

☆ **6:16** Livae 26:12; Jeremaea 32:38; Esikel 37:27 ☆ **6:17** Asaea 52:11 ☆ **6:17** Esikel 20:34

tqrninr kx, “Sa nanginibo Trtemu, x nanginimu mrlxngeng x inyxngeng.” ☆

## 7

<sup>1</sup> Mzlengeng x inwengeng, mz nzaotikr drtwrgu da lcng tqesalz-ngrmle bagu, naesakipe nzale-krqu alwx amrlx, kxmule-esz' mz nrkrdrtqgu o mz nzaokrgu drtwrgu. X mz nzmyatitr-krqu Gct, nztubqkr nzmnc-krqu naetunepx zvz.

<sup>2</sup> X yrnititrho bamu nzayzlu-kz-krmamu bagr mz nivz lrmu. Murde trpnzngnr nimu kx atrkatikr, trpnzngnr nimu kx alvztr-rbrkr, x trpnzngnr nimu kx esabrtikr mz nztwz-krgr dztu-drng. <sup>3</sup> Trycmne-ngrpou lc murde na-amyatibo drtqmu. A' da kc tqwai nzpi-krbole bamu mzli kc, kx nzmrlzti-krgr nimu sa navz zvz, kxmule-esz' bzku o luku. <sup>4</sup> Pipxpebo da kx yc mz nabznge, murde brti drtwrnge nimu. X glqpx-lzbq-ngrne nimu mz nzvz-nqblq-krmu Kxetu. X apqtrple drtwrnge mz nzpi-krm Taetus bange kx vz-nqblq-angidramu natqngeng mz letz kc kai. Abrtzlvzx nimu, kxmule-esz' prtilzle nigr nzkxpungr kxkqlu.

### *Nzrlwakr Taetus Lr Korint Kxnzrlxngiting*

<sup>5</sup> Mz nibr nzkrlyz-krbzkr provins kc Masedonia, trmnc-zpwxkru murde tr-rmctikru Taetus mz nzyzlu-krmle bange. Mzli lcde nabzgr talv-zotx zlwx, murde rmctikr nzkxpungr mrkang kqlu, x mrlcdeng amrlx leplz otabrkr badr mz

☆ **6:18** 2 Samwel 7:14; 1 Be Ngrdr 17:13; Hosia 1:10; Jon 1:12

nzycmnengr. X mwxlr-ngrgr drtwrgr nzlitr-krbzle mz Taetus mz nzatrkangr nide, x kx kz mz drtqgr kxnamu nzayzlu-krmamu letz scenge. <sup>6</sup> A' mz nibrde, Gct kc tqapqtrpzle drtwr leplz kx nabzdr talvzo, apqtr-kzple drtwrgr mz nzvz-krm Taetus. <sup>7</sup> X Taetus aelalz-zlwzmlle drtwrgr mz nzrpi-krmle bagr kxmu nzapqtr-krbzmu drtwrde. Murde rpimle bagr kx sutitx zlwz drtwrmu nzoklati-krbo nimu, x drtwrmu vztx-ngrde kxmusrnamu ninge mzli kc, x mzli ka vqti drtqmu nzmncz-krmamu bange mz nzngini-krnge aposol ngrmu.

<sup>8-12</sup> X mzli ka abrtz-ngrne nzyr-krbo letz lc, murde atutrle me pnz drtwrnge mz nzbatr-krbzle bamu nzkrz-krmu kx mrlzti-angidramu ninge x amatq-angidramu ninge. X okatrle nimu murde narmu nalvxpxbzle mz nzale-krmu da kxtubq. X atwzlr-kz-ngrpo letz lc mz nzatubqti-krnge ncblo kc tqvz-rbr x mz nzokatrnr leplz kcng tqatrkatile. Kxmule-esz' pnanati-zlwzx nimu mz letz lc, a' mz nzyr-krbole, drtwrnge vz murde krlzx kx sa na-avz-kzpze drtwrmu. X nzvzkr drtwrmu lc, krlzle nzyrkrpx-krde mz da kxtrka o da kxmrlz. Murde mzli kc drtwr leplz tqvz-ngrde x aoti txpwz drtwrdr da kxtrka lcng x nzpxtpx-ngrdr nztekqtr-krdr nqm q nr drtwrdr, krlc da kx na-akipx-lzbq-ngrdr badr Gct x batrpze nzvz-krdr mz nzbz-alongr mz Hxl. A' mzli kc nzvzkr drtwr leplz tqbatr-ngrbzle nzavzo-lzbq-krdr x nzyzlu-krbzlr mz Gct, krlc da kx na-ayrkrpxle nzvzkr drtwrdr mz nztekqtr-krdr nqm q nr drtwrdr. X awi-ngrbo mz Gct kx mz nzvzkr drtwrmu, yzlutiamu

nide x sc tqtekqtrpeamu nqm̄q nr drtwrmu. Murde da kxmrlz kxkqlu kx nzvzpxmqng elr. Aesakipeamu nzale-krmu da kxtrka. X drtqmu myape-ngrde nqm̄q lcng tqtrka. X amatqpeamu ninge mz nzngini-krnge aposol. X mzli ka sutitx zlwz drtwrmu nzmnc-lxblr-kr̄gu. X sc tqrpwa'pe-ngrbzmu mz leplz nzpibqti-krdr ninge. X sc tqayrplapxpeamu ncblo lc tqvz-rbr. Da lcng amrlx nzaelwapx-ngrdr kx drtqmu vq mz nzatubqti-lzbq-krmu mz nzvz-rbr-krmung. Mz nzmu-krde lcde, drtwrnge trvzpeu mz nzyr-krnge letz lc, a' drtwrnge elalz-zlwz pem. Murde vztx-ngrpwz drtwrmu mzli mrbcne x letz lc batrpzle nzyzlu-krbzmu mz Gct, a' trbatrpwzleu nzesablqti-krmu nide. <sup>13</sup> Da lcng amrlx nzapqtrplr drtwrgr. X abrtz-zlwz-ngrgr nzabrtzkr Taetus mz nzoklati-krbzle nimu, murde nimu amrlx apqtrpzmu drtwrde mz nqm̄q krmu. <sup>14</sup> Mzli kc narkalzpe-ngrmle, pibo mz Taetus kx glqpx-lzbq-ngrne nimu, murde lxngiti-angidramu x vqti drtqmu nzwztr-krbzmu mz Gct. X mzli kc tqkrlzpe-ngrbzle nimu, tramyatipwamuu drtqngce, a' mcle kx nike pibo bade da angidrtx, da kc tqwai mz da kcng amrlx tqpitibong bamu. <sup>15</sup> Nzmr̄ltikr Taetus nimu etunepx mz nzaotikr drtwrde kx drtqmu vq mz nzmnc-lz-krbzmu mz zmatq ngrde x amatq-zlwzamu nide mz nzngi-krde menrpa nenge. <sup>16</sup> X mzli ka, abrtz-zlwz pex murde drtwrnge brpe kx sa na-ale-zvzpeamu da kxtubq.

## 8

*Nzatakqtingr Trau Mz Nzwzkr Lrmakxtr*

1-2 Mz lengeng x inwengeng, suti drtwrgr nakr-lzamu nqm̄q kr dzbe lrmakxtr kcng mz Masedonia Provins. Murde mz nzvz-nq̄blq-krde zmrlz ngr Gct kxmyalz, drtwrdr elalz-zlwzm mz nzrka-nrbalq-krdr da kxkqlu mz nzokatr-krdr kztegungr lr Jiu kcng Jerusalem kx trpnznḡr scdr da. X nzalelr da lc kxmule-esz' nidr esz'-krdr trpnznḡr scdr da x kxtrnzrlxnḡitiung nzaetq-zlwzbzle drtqdr. <sup>3</sup> Napi-zpwxbo bamu kx nzkapxlr da kxkqlung. X mzli ka nzmnc-xglenepwzlr da kxpipzne. Trpnznḡr kx rpibz badr nzale-krdr da lc, a' pnzpe drtwrdr esz'-krdr. <sup>4</sup> X nzrlxtitx-zlwzmlr bagr nzrlr-krbzkr nzprtr-krdr mz nzataktingr lc, murde naokatr-kzlr dzbe lrmakxtr kcng Jerusalem. <sup>5</sup> Mz drtwrgr nakatxpxpwzlr trau kxpipzne. A' sc tzmyaszpxpelr mrkc tqpnz drtwrgr. Murde mzli kc kai nzrlrpx-lzbq̄bznḡ mz Gct mz nzale-krdr me pnz drtwrde. X mz nibrde nzrlxtimlr bagr nzpi-krbzkr badr nike na-alebzlr bade. X sc tzkapx-ateng trau kxkqlu.

<sup>6</sup> X nzrka-nrbalq-krdr da adcp̄xle drtwr̄nge mz nimu x nqm̄q krmu. Delc tq̄rtulrtr-ngrbole mz Taetus mz nyzlu-krbzle bamu mz nzokatr-krde nimu nzayrkrpx-krmu nzataktingr lc. Murde nide kc tq̄yzutrp̄zle nzwznḡr lc bamu mz yiz kc tq̄vztxpe. <sup>7</sup> Sc tq̄wz-angidrpeamu mz zmatq̄ kxkqlu mz nzwztr-krbzmu mz Gct. Murde wz-angidrpeamu mz zmatq̄ ngr nzrlxnḡitingr, nzrplzpxnḡr nrpa kx kabz Gct, nzrpipxnḡr nrpa ngr nzkrlznḡr, x drtq̄mu vq̄ mz nzokatrnḡr. X mrlztiamu nigr mz nivz kc tq̄aelwapx-kaingrbzkr bamu. X mzli ka takitrde nzwz-angidr-



kz-krmu mz zmatq ngr nzrka-nrbalq-ngrbz da mz leplz kx trpnzngr scdr da.

<sup>8</sup> Krlc trngiu natq kx rngidrlvz-ngrbo bamu. A' suti drtwrnge kx drtqmu navq kz nzrka-nrbalq-krbzmu da mz leplz mz nzaelwapx-krmu kx mrlzti-angidramu nidr; da kc tzwaipe lr Masedonia kxnzrlxngiting. <sup>9</sup> Murde Kxetu rgu Jiszs Kxnzmcpx aelwapx-ngrbzle zmrlz ngrde kxmyalz bamu. Rlasmle Heven mz nzngini-krde bcnyr elr; mz nzngini-alzu-krde kxtr-rngiscu mz nrlc, murde naprtr-kzamu mz da kxmrlzting sc Gct kcng tzvzpxmqng mz nzwz-krde kx etq-nrbalqngr drtq mrka.

<sup>10-11</sup> Mz yiz lc tqvztxpe nimu lr Korint yzutrkaiamu nzataqtingr trau lcng. X drtqmu vq zlww nzale-krmule. A' na-ayrkrpxamu nzataqtingr lc mz nzrka-mou-krbzmu trau kznike ycpebz bamu mzli ka. Murde nzvqtikr drtqmu lc mz nzale-krmule navz zvz nakrlzbzle nzayrkrpx-krmule. Pibo da lc mz nzokatr-krnge nimu. <sup>12</sup> Gct suti drtwrde kx navqti drtqmu nzrkapxngr da. X mz nzvqkr drtqmu lc, abrtzlvzle nzrkapx-krmu da, mz nzvz-nqblq-krde da kx ngiscmu, kxmule-esz' doa kx esz' kapxle da kqlu o pipz.

<sup>13</sup> A' trsutiu drtwrnge nzkapx-krmu da kxkqlu x trpnz-alzungr kx nangi scmu. A' nimu amrlx narngisc-kzpu da kx natakitrde nzmnc-xgle-krmuleng. <sup>14</sup> X mzli ka mz nzrngisc-krmu da kxkqlu takitrde nzokatr-krmu kx trpnzngr scdr da. X mz kzdu mzli kx natakitrde, sa na-ayzlu-kzpzlr bamu. <sup>15</sup> Murde Nzryrngkxtr mz nzymnetr-krde mz dakxnzng kx atwzlo-ngrm Gct lzke, rpile kx, *“Doa kx rtwz dakxnzng kxkqlu,*

*bzkq ngi natxpwzle esz'-krde. Murde doa kx rtwz dakxnzng kxpipz, narngina kz dakxnzng kx namnc-xglele.”* ✧

16-17 Rtulrtr-ngrbzkzr mz Taetus nyzylu-mou-krbzle bamu. X angqlzlvzle drtwr lc, murde aotipe kz drtwrde nzale-krdele. X awi-ngrbo mz Gct nzbatr-krbzle nzvqtikr drtqde nzokatr-krde nimu mz nzatakqtingr lc, da kc tqwai nzsuti-kzkr drtwrnge le. <sup>18</sup> Atwzlr-ngrbzkzr Taetus x kzdq mzlegu kx nzamatq lr makxtr amrlx mz nzyapwxtipx-krde Nrpakxmrlz. <sup>19</sup> X nzmcpxlz nide murde navznekr badr mzli kc natwz-ngrbzkzr trau lcng mz lr Jerusalem. Alekr nzwzngr lc mz nzamatq-krgr Kxetu rgu x mz nzaelwapx-krbzkr mz lr Jerusalem kx suti drtwrgu nzokatr-krgru nidr.

<sup>20</sup> Alekr da amrlx mz nzatakqtingr lc, murde leplz ma tzpibqtilr nigr mz kxmu nzlolvz-krgr trau kxetu lc. <sup>21</sup> Murde suti drtwrgr nzale-krgr da kxtubq mz nzobqkr Gct x mz nzobqkr leplz.

<sup>22</sup> X atwzlrmi-ngrbzkzr ncblo lcng nzling kzdq kz mzlegu. Murde krlzkr kx nide ncblo kx brti drtwr nzwztr-angidr-krbzle mz Gct. X drtqde vq zl wz nzokatr-krde nimu mz nzatakqtingr lc, murde Taetus pibzle bade nzmrlzkr nqm q krmu. <sup>23</sup> Ncblo lcng brti drtwr mz nzlolvz-krdr trau scmu. Murde Taetus nide kztenge kx wz-lxblrkr ncdr mz nzokatr-krgr nimu. X kxnzavleng dzbe lrmakxtr nzatwzlr-ngrbzlr mzlegu lcng nzling x leplz nzglqlzlr Kxnzmcpz mz nzmrlzkr nqm q krdr. <sup>24</sup> Mz nzm-krde lcde, aoduamu

nidr murde dzbe lrmakxtr kcng tzatwzlr-ngrmlr  
nidr bamu nakrlz-angidrlr kx trpokiawxu mz  
nzglqpx-krnge nqm q krmu.

## 9

<sup>1-2</sup> Krlzx kx abzo mz yiz kc tqvztxpe, vqti  
drtqmu nzprtr-krmu mz nzatakqtingr trau lc  
mz nzokatrngr lr Jerusalem kxnzrlxngiting. X  
trpengr nzpi-krbo bamu kx da lc ngi da kx  
myapxbz. A' nakrlzamu kx glqpx-zlwzbo nimu  
mz lr Masedonia Provins. X mz nzxlr-krdr  
nzvqkr drtqmu mz nzatakqtingr trau lc, ba-  
trpzle badr nzvq-kzkr drtqdr nzprtr-kz-krdr  
elr. <sup>3-5</sup> Mz nzmukrde lcde, na-atwzlr-ngrbo  
mzlegu lcng tq bamu, mz nzatakqti-krbzlr bamu  
trau kc tqpiamu kx nakapxamu. Murde suti  
drtwrnge kx trau lcng naye pnz kai mzli kc  
nakaputr-ngrbo bamu. Mrlz nzoliqti-angidr-  
krmule, murde ma tqmyangr drtqmu x drtqnge  
kz mz nzglqpx-krnge nimu, nzmukdzung lr  
Masedonia navzbzkr badr. A' mrlz nzoliqti-kai-  
krmule, murde ma tzrpi drtwrdr kx rtulrtr-ngrbo  
bamu nzkapx-krmule.

<sup>6</sup> Murde nzrka-ngrbz da mz kx trpnzng scdr  
da apule nzpengr da mz nrlanc nyz Gct. X esalz-  
ngrmle bagu kx sa na-amrlzle doa kx alele da lc.  
X Nzryrngrkxtr alvztr-ngrde nigu kx, “Doa kx pe  
dakxnzng kxpipzne, sa narkqtile da kxpipzne kz.  
A' krkcng tqpe dakxnzng kxkqlu, sa narkqti-kzle  
da kxkqlu.” ✧ <sup>7</sup> Mz nzmukrde lcde, doa kxesz'  
mz nimu, nakrka'-kai-ngrbzle mz Gct x nakapxle

✧ **9:6** Nzyrplapxng 11:18; 19:17; Hosia 10:12; Matiu 10:42; 25:34;  
Luk 6:38; Galesia 6:7

nike pnz drtwrde nakapxle. A' bzkq rkapxq murde mz drtwrm nzrtultr-ngrbz bam, murde ma tqavzbzle drtwrm. Murde Gct abrtzlvz-zlwzle doa kx rka-nrbalq da kx vzdz-angidrm mz nabzde. <sup>8</sup> X mz nzale-krmu da lc, Gct krlz-zvzle nzrka-nrbalq-krbzle da kxkqluting bamu, mz nzvz-nqblq-krde zmrlz ngrde kxmyalz-esz'ngr. Murde sutitx drtwrde kx namnc-zpwx-zvzamu mz nzrtwz-krmu da amrlx kx takitrde nzmnc-xgle-krmuleng. X suti kz drtwrde kx nartwzamu da kx nzmyaszpxlr da lcng, murde naokatr-kzamu kx trpnzngr scdr da mz nzkqlukr dz-tumung. ✧ <sup>9</sup> Murde Nzryrngrkxtr ycmnetr-ngrde ncblo kx rka-nrbalq da mz nzrpi-krde kx, *“Tresakiu nzrka-krbzle da mz kxrsuti drtwr. Vz zvz nzayzlu-krbz Gct bade mz nqm q krde lc tqtubq.”* ✧

<sup>10-11</sup> X rpi kz Nzryrngrkxtr kx, Gct rkam “rtq da kx napeti. X rka-kzp dakxnzng kx nangq.” ✧ Mz nzm-krde lcde, nzrka-krbzle bamu da x nzkrlzng kxkqluting sa naetunepx zvz, murde nzokatr-nrbalq-krmu leplz naetunepx zvz kz. X trau kcng natwzbzkr mz lr Jerusalem, sa naba-trpzle badr nzawi-krbzlr mz Gct mz nzokatr-nrbalq-krmu nidr. <sup>12</sup> Delc, da lcng li nzvzpxmqng mz nzokatr-krmu leplz kcng trpnzngr scdr da. Leplz lcng nzrtwzng da kx takitrde nzmnc-xgle-krdrle x nzawi-krbzlr mz Gct etunepx zvz. <sup>13</sup> X lr Jerusalem lcng, mz nzngini-krdr lr Jiu, sa naglqlzlr Gct murde nzokatr-nrbalq-

---

✧ **9:8** Livae 25:35; Lou Kcpwz 15:7-11; Efisz 4:28; Filipae 4:19; 1 Timoti 6:6-10 ✧ **9:9** Sam 112:9 ✧ **9:10-11** Asaea 55:10

krmu lc nidr, kxmule-esz' trnginipuu lr Jiu. X da lc aelwapx-zpwxbzle badr kx lxngiti-angidramu Nrpakxmrlz x drtqmu vq mz nzvz-nqblq-krmu natq Jiszsz. <sup>14</sup> X sa nakrka'-ngrdr nimu mz nivz kxetu, murde Gct aelwapx-ngrbzle badr zmrlz ngrde kxmyalz mz nzokatr-krmu nidr. <sup>15</sup> X na-awi-kzpzku mz Gct mz nzka-nrbalq-krmle Mrlxde bagu, kxmule-esz' rblxm bagu nzrpi-krqu nzetukr zmrlz ngrde lc tqmyalz.

## 10

### *Pol Ayzlubzle Natq Leplz Kcng Tzpiqtilyr Nide*

<sup>1</sup> Mzli ka, ninge Pol, sa na-ayzlubo natq leplz kcng tzpiqtilyr ninge, mz nzrpikr kzdung nimu kx trngini-angidrngeu aposol. Nzycmne-krdr kxmule lc murde pnanatix nimu mz letz scngeng, a' vz-nrwx-ngrbo bamu mzli kc tqmnc-ngrgu badr. A' mz nzvz-nqblq-krnge Kxnmcp, avzolzbx x vz-nrwx-ngrbo bamu, mz nzrlxti-krbo bamu kx bzkq pibqtipeamu ninge. ✧ <sup>2</sup> Mzli kc navz-ngrmc bamu, trsutiu drtwrnge nzpnanati-mou-krnge nimu mz nzayrplapx-krnge nimu. A' mw x sa na-alebo da lc mz leplz kcng tzrpilr kx vz-nqblqkr drtwr leplz mz nrlc ka. <sup>3</sup> Kxmule-esz' mnckr mz nrlc, a' trotabl-nqblqkru nqm q kr lr nrlc mz nzotabl-krgr badr leplz kcng tzrpwa'-ngrmlr nzwx-krgr. <sup>4</sup> Murde zmatq ngr nzota-krgr trvzpxpuu mz natq leplz kxtrnzrlxngitiung mz nzesabrtingr leplz. A' plzpxkr natq angidr kx kam Gct bagr. X natqdeng nzrngiscng zmatq ngr nzodatingr nqm nr drtwr kznikeng trngiu

✧ **10:1** Sekaraea 9:9; Matiu 5:5; 11:29

da angidr. Natq lcng xplr x nzkrzlzr nzbatr-krbzlr mz leplz nztekqtr-krdr nqmq nr drtwrdr. Murde nqmq nr drtwrdr lcng tzvz-rbrng nzapulr lrpalc kx xplr kx nzawxongr mz zmatq ngr Gct. <sup>5</sup> Murde miltxokr drtwr x nzymnengr amrlx kcng tzrpwa'-ngrbzlr mz leplz nzkrzlz-angidr-krdr Gct. X aovxiokr nqmq nr drtwr lcng amrlx tzvz-rbrng, murde nzaotikr drtwr leplz da navz-nqblq-txpwzle me pnz drtwr Kxnmcpx. <sup>6</sup> X mzli kc navz-ngrmgr bamu x namc-ngrbzkr krkcng nzmnczpebzng mz Kxnmcpx, sa na-ayrplapx-atekr nimu kcng tzxpqbrlr-ngrdr nide mz nzpctxpx-krmu nzmncz-krmamu bagr.

<sup>7</sup> Leplz kcng tzpibqtilr nigr nzrpilr kx nidr leplz neng Kxnmcpx. A' nakrlz-angidramu x leplz lcng nakrlz-kzlr kx nigr kz leplz nedeng. <sup>8</sup> Drtqngc trmyau mz nzglqpx-lzbq-krgr mz zmatq kc tqkaom Kxetu rgu bagr. Murde zmatq lc ngi dalr nzokatr-krgr nimu mz nztu-amqngi-krmu mz nzrlxngiti-krmu, a' trngiu dalr nzatrkatingr nimu. <sup>9</sup> Dekc trsutiu drtwrnge nzmwxlrsti-krmu ninge mz natq kcng tqyrbo bamu mz letz scngeng. <sup>10</sup> Krlzx kx kzdung nimu nzrpilr kx, "Nzymnekr Pol mz letz scdeng matq-esz'ngr. A' mzli kcng tqmnc-ngrgu badr apunede ncblo kxmane x nzymne-krde trxplru." <sup>11</sup> A' rngidrlvz-ngrbo mz leplz lcng, kx mzli kc namnc-ngrgu badr, sa na-atutr-angidrkr natq amrlx kcng tqyrbzkr mz letz scgrng, mz nzaelwapx-krbzkr bamu kx rngiscgr zmatq.

<sup>12</sup> Trmrlzu nzrpi-krgr kx apukr leplz lcng. Murde nzrpilr kx nidr leplz kxnztubqng x nzmyapxbzng mz kzdung kz kxnzetung. A'

mz nzaotikr drtwrdr nike tubq x myapxbz, nzobqtitxtrpwzlr nidr esz'-krdr. Krlc aelwapx-ngrde kx nzngqngu-angidrng. <sup>13</sup> A' trapukru nidr. Murde glqpx-lzbqtx-ngrpwzkr zmatq kc tqkaom Gct bagr. X nimu amrlx ngrmu mnclzmamu bagr mz zmatq lc. <sup>14</sup> Nzmu trnayapwxtipxpwzkru Nrpakxmrlz bamu, vz-rbrkr mz nzrpi-krgr kx namnclzmamu mz zmatq ngrgr. A' ryapwpx-ayrnr-ngrbzkcr Nrpakxmrlz bamu. X rngiscgr zmatq ngr nzngini-krgr aposol kcng tqmnclzbzmu badr. X krkcng tzvzmqng mz nibrgr trnzrngiscung zmatq lc. <sup>15</sup> Trglqpx-lzbq-ngrgu nzwznggr kx nzale kz-dung kz leplz, da kc tzwailr. A' obqtipxkr mzli kc nabrpengr nzrlxngiti-krmu, murde mzli lc nakrlzamu nzokatr-krmu nigr mz nzvzpx-krgr mrkang kqlu mz nzyapwxtipx-mou-krgr Nrpakxmrlz. <sup>16</sup> Murde suti drtwrgr nzyapwxtipx-krbzkrle mz leplz kcng trnzxlrkalkr Nrpa lc. X dekc krlzkr nzglqpx-lzbqtx-krpwzkr nzwz-krgr esz'-krgr, a' trngiu nzwzkr kzdu-kzng leplz.

<sup>17</sup> X nzglqpx-lzbq-krgr mz nzwz-krgr lc, vnzqblqle Nzryrngrkxtr kx rpile kx, *“Trtakitrdeu doa nzglqpx-lzbq-krde mz nike alele, a' naglqpx-tpwzle Yawe mz nike alele.”* ✧ <sup>18</sup> Murde kxnzglqpx-lzbqng esz'-krdr trabrtzlvzu Gct nidr, a' nide esz'-krde kx takitrde nzglqpx-krde leplz kcng tqabrtzlvzeng nidr.

## 11

<sup>1</sup> Mzlangeng x inwengeng, kxmule-esz' kr-lzamu kx takitrpwzle Gct nzglqpx-krde doa, a'

✧ 10:17 Jeremaea 9:23-24

suti drtwrnge kx narlr-ngrmamu bange nzglqpx-lzbq-krnge mz nzymne-ngqngu-krnge, da kc tqwaipeamu. Murde ncblo lcng tqabrtzlvzamu mzli ka, trnginidru aposol angidr. <sup>2</sup> X tubq nzdobulvz-krnge nimu, mz nzapu-krbo bamu trtemu kc tqyapwxtipx-ayrnr-ngrbo Nrpakxmrlz bamu. X suti drtwrnge kx nivz lrmu natubq mz nzmrlztitx-krpwzmu Jiszs Kxnzmcp, da kc tqwai trte olvi kx nayrlz suti drtwrde kx nqm q kr olvi lc natubq, mzli kc narlr-ngrbzle mz ncblo ngrde. Murde esalz-ngrbo mz Jiszs kx nanginimu leplz kxnztubqng. ☆ <sup>3</sup> A' mwxlrtix kx Setzn sa na-avz-rbrbzle drtwrmu x nabatrpzle bamu nzvecp-x-lzbq-krmamu mz nzmrlztitx-krpwzmu Kxnzmcp, da kc tqwai pnz Setzn mz nzesabrti-krde Iv. ☆ <sup>4</sup> Murde lxngitiamu nrpa kx nzyapwxtipx ncblo lcng, kxmule-esz' blepxbz mz Nrpakxmrlz kc tqyapwxtipx-ayrnr-ngrbzkr bamu. X suti drtwrmu nztwz-krmu kxmnc mzlilxlr kx trngiu Mqngrkxtr.

<sup>5</sup> Kxmule-esz' ncblo lcng nzrpilr kx nidr aposol kxnzmyapxbzng, a' mz drtwrnge trnzmyaszpxlr u ninge. <sup>6</sup> X kxmule-esz' trkrlz-zpwxwxu kxmu nzymnengr, da kc tzwailr, a' krlzx nzalvztrngr angidrng. X aelwapx-ngrbzkr bamu zmatq ngr nzrkrlzng lc mz da kx pibzkrng bamu x aletikrng mz mzlirmu.

<sup>7</sup> ?Nike tqrpiamu mz drtwrmu kx trmrlzu trnzrtwz-krngeu dztumung mz nzyapwxtipx-krbo bamu Nrpakxmrlz? Murde apux Kraes

---

☆ **11:2** Matiu 22:1-2; Jon 3:29; Efiszs 5:22-32; Nzaelwapxng 19:7-8; 21:2, 9 ☆ **11:3** Nou 3:1-6, 13



mz nzavzo-lzbq-krnge murde naokatr x nimu, a' rpiamu kx trtakitrdau ninge. A' tratrkatixu nimu mz da lcong. ✧ <sup>8</sup> Murde mzli kc tqryapwxpx-ngrbo bamu, rlr-ngrbo mz kzdung kz dzbe lrmakxtr nzokatr-krdr ninge mz trau. Murde nzkrzlzr kx ninge trtedr mz Kxnmcp. ?Myx kxmule, ncblo lcong tzpibqtilr ninge narpi-kzlr kx pnatibo dztu dzbe lrmakxtr lcong? <sup>9</sup> Kxmule-esz' kzdung mzli trpnzng nange dakxnzng, a' tr-rlxpou da bamu. Murde mzli lcde, kzdung mzlegung kcong Masedonia Provins nzvzmqng x nzrkamqng bange trau kx namnc-xglex. X trpnzng nztokqtr-krnge nqm q krnge lc. \*

<sup>10</sup> X pi-zvzbo da angidr bamu, da kc tqwai Kxnmcp. Murde tr-rlxpou da bamu, nimu lr Akaia Provins, murde ma tzrpi leplz kx pokia-ngrne nzglqpx-lzbq-krnge nzwztr-nrbalq-krbo bamu. <sup>11</sup> Kzdung leplz nzrpiplr bamu kx trnzrtwz-krngeu dztumung drtwr ngrde kx trmrlztiwxu nimu. A' nzpokiang, murde krlz Gct kx mrlzti-zlwzx nimu. <sup>12</sup> Ncblo lcong tzpibqtilr ninge nzrpiplr kx rsakrlrkr badr mz nzprtr-krdr mz nzwzng kcpwz tqalekr. A' sa na-ale-zvzx nqm q krnge mz nzwztr-nrbalq-krbo mz leplz, murde na-awx-nabux nzglqpx-lzbq-krdr lc. <sup>13</sup> Murde ncblo kxdrka'ngr lcong tzesabtilr nimu mz nzrpi-krdr kx nidr aposol neng Kraes, a'

---

✧ **11:7** 1 Korint 4:12; 9:3, 12, 15-19      \* **11:9** 11:6 Mwx Pol ycmntr-ngrde nzamrlz-krde nrkrdrdq leplz x nzale-krde da kxnzktipxng mz zmatq ngr Mqngkrxtr. 11:9 Nqm q kr Pol bletipxbz mz nqm q kr aposol kxnzpokiang. Murde nzrlx-zvzbzng trau kxkqlu mz lr Korint mz nzaetunepx-krdr trau scdr x zmatq ngrdr.

trznnginidru aposol angidr. <sup>14-15</sup> Bzkq kctipxamu nidr. Murde kxmule-esz' ncblo lcng tzapusr-lzbq-ngrdr kxnzawzng ne Gct, a' nzvz-nqblqlr nqm q kr kxetu rdr Setzn, kc tqapusr-lzbq-kai-ngrde enjrl kxluli ne Gct. A' mzli kc nayzlu-ngrm Jiszs, sa na-ayzlubz Gct badr nikeng nzalelr mz nrhc ka.

<sup>16</sup> Nzmu narpiamu kx ngqngux, mrlz nzlaltq-krmamu bange nzglqpx-lzbq-krnge mz nzymne-ngqngu-krnge, da kc tqwaipeamu mz nzlaltq-krbzmu mz ncblo lcng tzglqpx-lzbqng.

<sup>17</sup> A' nzymne-krnge trapuleu nzymne-nqblq-krnge Kxnmcp. A' nzglqpx-lzbq-krnge apule kxnzngqngung kcng tzbtrt drtwrdr nzglqpx-lzbq-krdr.

<sup>18</sup> A' mz nzlaltq-krbzmu mz nzglqpx-lzbq-krdr, nalaltq-kzpa'mu mz nzglqpx-lzbq-krnge.

<sup>19</sup> Mz drtwrmu yrplapx-zlwzamu. ? A' myx kxmule tqabrtzlvz-ngrnamu ncblo kxnzngqngu lcng?

<sup>20</sup> Murde abrtzlvzamu nidr, kxmule-esz' nzapusr-ngrdr nimu kxnzawz nedrng, x nzrlx-zvzbzng bamu trau kxkqlu, x nzesabrtlr nimu, x nzobqszolr nimu, x nzamyatibzlr drtqmu mz nzviplatr-krbzlr blzmr naomu. <sup>21</sup> Drtwrnge vztz zlvz murde nigr ncblo kxnzmaneng x rblx nzvz-nqblq-krgr nqm q krdr.

A' abrtzlvz-kzamu nzlaltq-krbzmu mz ncblo lcng nelzdr tqbr mz nzglqpx-lzbq-krdr. X mzli ka nalaltq-kzpa'mu mz nzymne-ngqngu-krnge, murde nelzng br kx sa namyaszpxx nidr mz nzglqpx-lzbq-krngeng.

<sup>22</sup> Nzglqpx-lzbqng mz nzngini-krdr lr Hibru, a' ninge kz. Nzrpilr kx nidr leplz neng Gct mz nzngini-krdr lr Israel, a' ninge kz. Nzrpilr kx nzvzpxmqng mz nqvi lr melrmqgr Ebraam, a' ninge kz. <sup>23</sup> Nzrpilr

kx nzwztrpzng mz Kxnmcpx. X kxmule-esz' lukurnr-ngrne mz nzpi-krngele, a' nzwztr-krbo bade myaszpx-zlwzle nidr, mz da lcde seleng. Vz zvz nzyapwxtipx-krnge Nrpakxmrlz. Nzadwa-trngr ninge mz presin nzwrd kqlu. Nztabwxti-krdr ninge nzwrd kqlu kx ycpwz pipz nzbz-krnge. <sup>24</sup> Nzwrd nzlvsqn kxnzetu r lr Jiu nzikla-krdr ninge. X mz nzwrd lcng nzlvsqn, nzwrbz nzpnu-tq-nrade-rpwxmz (39) lxblr. †

<sup>25</sup> Nzwrd tq nztzng lr Rom ninge mz dapunc. Nzwrd esz' nzvaebrtingr ninge mz rplz. Nzwrd tq mnco-ngrmc mz lcsu kx nzwxlzng. X mz kzdq mzli lcdeng, lvabetilzx mz dapunc prla zbz kx yc atwrnrngr esz'. <sup>26</sup> Nzwrd kqlu kx vzpx-ngrne mz nzwztr-krbo mz Kxetu. X mz nzvzpx-krngeng amrlx prtilze ninge da kxtrka kxkqlu. Murde rmctix ncblo kxayo, x lr Jiu x kxtrngiulrJiu kcng tzaetqbzlr drtqng. X leplz kcng tzpokieng mz nzrpi-krdr kx nidr leplz neng Jiszs, nzatrkatikzlr ninge. X rmcti-kzx nubla ngr lue x trlipu kxetu prla. Kxmule-esz' mncx mz mztea o peto, a' da kxtrka nzprtilz-zvzlr ninge. <sup>27</sup> Yctxbz nzwz-kato-krnge x kzdung mzli trmwi-pnzwxu. X mzli kqlu kx trpnzng nange da x mqng lue, x mzli kqlu kz kx trmu-ngrneu. X mzli kqlu kx baongr drtqng murde trpnzng me namnc-ngrne x trpnzng scng lrpz. <sup>28</sup> X mou, mz zbz

---

† **11:24** Lou sc Mosis rlr-ngrbzle mz lr Jiu nzikla-krdr ncblo nzwrbz nakrlz-tpwzle nzpnu-kxpwx (40), murde ma tzabzlr nide. A' lr Jiu pnzpe drtwrd kx nakrlz-tpwzle nzwrbz nzpnu-tq-nrade-rpwxmz (39), murde ma tzxpqbrlr-ngrdr lou lc mz nzrlwx-rbr-krdrle, x sc tzkrlzpebzlr nzwrd kx nzpnu-pwx-nrade-esz' (41). [Lou Kcpwz 25:1-3]

kang kqlu yc txpwz mz drtwrnge lrmakxtr amrlx kcng tzmnczmqng bange. <sup>29</sup> Murde nabznge talvzo zvz mz nzxlr-krnge kx nabzdr ngrgo. X ngyatx-zlwzng drtwrnge leplz kcng tzataolr nidr mz alwx.

<sup>30</sup> A' mz nzglqpx-lzbq-krnge mzli ka, naglqpx-lzbq-ngrpwo mz da kx aelwapx-ngrde kx ninge ncblo kxmane. <sup>31-33</sup> Murde kzdq mzli kx mnc-ngrne mz taon kxetu Damaskzs, gavzna kc tqmnczlbz mz King Aretas, suti drtwrde nzlolvz-krde ninge. Zbz sc tqpipebzle mz ncblo ngr vea nedeng, nzaclve-krdr naobz amrlx ngr taon lc. A' kzdung lrmakxtr nzokatrlr ninge. X nzadwaolr ninge mz toplu kxetu mz nzapu-krnge dakxnzng. X nzpetrpzlr nqvi elr, x sc tzavzopelr ninge nrlarde kx yz ngr bz ngr Damaskzs, murde nayrbqpxx, mz nzapu-krnge ncblo kc trpnzng scde zmatq. X Gct krlzle kx trpokiawxu. Nide kc tqngi Trte Kxetu rgu Jisz, x nzrglqlz-zvzng nide tqyc tqyc. Eu. ☆

## 12

<sup>1</sup> Kxmule-esz' trbatrpwzleu bamu nzrpi-krmu kx ninge aposol ngrmu, a' naglqpx-lzbq-mopwo. Murde mzli ka naycmnetrpex mz nzobq-rmwiblengr x da kx yc-kapq-pnzng kx aelwa-ngrm Kxetu bange. <sup>2-4</sup> Yiz nzpnu-esz'-nrade-pwx (14) kx vztxpe, avzdz Gct ninge Heven kc tqmyalz-esz'ngr. Trkrlzwxu kx vzdzx mz nrkrdrtnge kz o mz mqngrnge txpwz mz nzobq-rmwiblengr lc, a' Gct kx rkrlz. A' krlz-angidrx kx mncx Me Mncngr Gct. X mz nzmnc-krnge elr,

☆ **11:31-33** Aposol 9:23-25

xlrx da kx rblxm bange nzyapwxtrngr mz natq ncblo, x nzrpwa'-kz-ngrm bange nzyapwxtipx-krngeleng. \*

<sup>5</sup> Glqpx-lzbq-ngrne nzobq-rmwiblengr lc, a' Gct kx aelwapx-ngrm bange. Mz nzmu-krde lcde, glqpx-lzbq-ngrne da kx aelwapx-ngrde kx ninge ncblo kxmane. <sup>6</sup> Kxmule-esz' glqpx-lzbq-ngrne da kx obq-rmwiblex, a' trycmne-ngqnguwxu. Murde napitxpwo da kx ngi da angidr. A' trnaycmnetrpewxu mz da lc, murde ma tqamatq-zlwzamu ninge mz nzobq-rmwible-krngeng. Murde suti txpwz drtwrnge kx leplz naglqpxlr ninge mz nike nzmclr alex, x nzxlr lr pix.

<sup>7</sup> X ninge kz, trmrlzu nzglqpx-lzbq-krnge mz nzobq-rmwible-krngeng. Mz nzmu-krde lcde, rlr-ngrm Gct nzprtr-zvz-krnge mz kzdq nzkx-pungr. Murde nakrlz-angidrx kx trpnzng scnge zmatq, a' namnc-xglex nide. Nzxpungr lc ngi menrpa kc tqatwzlr-ngrm Setzn mz nzapu-krde dxpa' kx luplxti-zvzle nrkrdrtnge. <sup>8</sup> Nzwrde tq kx rlxti-ngrbo mz Kxetu nzkatxpx-krbzle nzxpungr lc bange. <sup>9</sup> A' rpimle kx, "Zmrlz rnge kxmyalz takitr-zvzde nzokatr-krde nim, kxmule-esz' da kx nzprtznge. Murde zmatq rnge wz angidr mz nzmnc-xgle-krm ninge mz mzlr nzxpu-krmqng." X mz nzlxnngiti-krnge da lc, abrtzlvzx nzngini-krnge ncblo kxmane.

---

\* **12:2-4** Mz drtwr lr Jiu, Heven kc tqmyalz-esz'ngr nide 'Me Mncngr Gct.' Nzrpi-kzpz 'Paradaes' mz natq lr Inglis. Krlc me navzki leplz kxnzrlxnngiting mz nibr nzbz-krdr. Mc kz Luk 23:43 x Nzaelwapxng 2:7, x natq lc mrkc Nzalvztr-ngrng Kxmyapxbz.

Delc tqgqlpx-lzbq-ngrne mz da lc, murde zmatq ngr KxnzmcpX na-aelwapX-ngrne mz nzlu-krnge. <sup>10</sup> Mz nzmu-krde lcde, kxmule-esz' ninge ncblo kxmane, x leplz nzpibqtilr ninge, x da kxtrka nzprttilzlr ninge, x leplz nzaetqbzlr drtqnge, x prtrX mz nzkxpungr, a' abrtzlvzX da lcng mz nzvz-nqblq-krnge KxnzmncpX. Murde zmatq ngrde wz-angidrm bange mzli kc tqmnc-xgle-ngrne nide.

<sup>11</sup> Nimu kX rbatrp bange nzycmne-ngqngungr mz nzglqpx-lzbq-krnge lcng. Murde nimu kX takitrde nzglqpx-krmu ninge mz nzmrlzkr nqmQ krnge. Murde kxmule-esz' ninge ncblo kxmane, a' krlzamu kX myaszpxX ncblo lcng tZrpilr kX nidr aposol kXnzmyalzng. <sup>12</sup> Murde mzli kc tqmnc-ngrgu, aelwapX-ngrbo bamu kX ninge angidr aposol, mz nzale-zvz-krnge rKX, x da kXnzktipXng, x da kXmatq kXkqlu mz zmatq ngr Gct. <sup>13</sup> Apusr-ngrne nimu da kc tqwaisr-ngrne lrmakXtr kc-kzng tzmncIzmQng bange. A' da esz'txu kX tr-rlr-ngrpou bamu, nzokatr-krmu ninge mz trau. Nzmu kX tqatrkatiX nimu mz da lc, rlxti-zlwzbo bamu kX mwx elX naipqamu ninge mz nabzmu.

<sup>14</sup> Mzli ka ycpe pipz nzvzkr-mopwo bamu mz nzwrde kratq. X sa navz zvz trnzrlr-krpou bamu nzokatr-krmu ninge mz trau. Trsutiu drtwrnge nzka-krmamu dztumung bange, a' suti drtwrnge nzka-krmamu bange nabzmu, mz nzamatq-krmu ninge. Murde nimu doa nengeng mz KxnzmcpX. X trtakitrdeu doa nzacIve-krdr trtedr. A' takitrde trtedr ncdR lxedr nzacIve-krdr doa nedrng, da kc tqwaix mz nzacIve-krnge

nimu. <sup>15</sup> Delc abrtz-zlwz-ngrne kx trpnzngr da kx lolvz-moux mz nzokatr-krnge nimu, murde mrlztix nimu mz nabznge atwrnrngr. X mrlz kz nzmrlzti-krmu ninge kxpipz.

<sup>16</sup> Mz trnzrka-krpwa'muu lc bange trau, kz-dung leplz nzrpilr kx esabrtix nimu x sa napatix trau kcng tqatakqtiamu mz nzokatr-krmu kx trpnzngr scdr da. <sup>17</sup> A' nzpokiang, murde ncblo kcng tqatwzlr-ngrbo bamu trnzatrkatilru nimu x trnzpnatipwzlr dztumung. <sup>18</sup> Murde mz nzatwzlr-krbo Taetus, atwzlr-kz-ngrbo kzdq mzlegu badr. X krlz-angidramu kx Taetus tresabrtileu nimu mz nztwz-krde trau scmung. X nqm̄ krgr esz' mz nzmnc̄lz-krbzkr mz Mqn-grkxtr. †

<sup>19</sup> Mwx mz drtwrmu rpiamu kx yro-ngrgr da lcng mz letz lc mz nzaelwapx-krgr nztubq-krgr. A' trtingr! Murde yrtpopwzkr da kx suti drtwr Kxnm̄cpx nzipix-krbzkrle bamu. X mz nzkr̄lz-krgr kx Gct obqom bagr, da amrlx kcng tqalekr x tqpikr ngi dalr nzaxplr-krbzkr nzrlxngiti-krmu, murde mrlzti-zlwzkr nimu.

<sup>20</sup> Mwxl̄rtix kx mzli kc nakrlz-ngrbo nimu, trna-abrtzlvzwxu nimu kcng tzp̄txpx-ngrdr da kcng tq̄pibo bamu mz letz kc pnz. Murde vz-rbrbeamu mz nzotabl̄r-lzbq-krmu, nzdobu-krmu, nzngyagr drtwrmu, nzota-krmu, nzrpibq̄ti-krmu, nzpokia-krmu, nzgl̄q̄px-lzbq-krmu x nzayctx-krbzmu nzwzkr leplz. Nzmu kx tq̄mule lcde, sa trna-abrtzlvz-kzwamuu ninge mz nzayrl̄plapx-krnge nimu. <sup>21</sup> X mwxl̄rti-kzx kx Gct sa na-amyati-

---

† **12:18** Lr Korint n̄amrl̄ue-zlwzlr Taetus.

mople drtqnge, murde glqpx-lzbq-ngrne nimu mz nzngini-krnge trtemu mz Kxnmcp. Trm-rlzu nzayrni-krmu ninge, murde kzdung nimu nzpxtpx-ngdrdr nztektqr-krdr nqm q nr drtwrdr mz alwx ngrdrng. A' vz zvz nzamyati-krdr drtqdr, nzmwimi-krdr leplz kx trngiu krnalzdr, x nzamqmiti-rbr-krdr mz nrkrdrtdr. ☆

## 13

### *Nzlc-apqzbkr Pol Kxrmnr-ngrbz Mz Krkcng Tzrpwa'-ngrbzlr Nzwz-krde*

<sup>1</sup> Mzli ka nzwrde kratq deka naoklati-ngrbo nimu. X mzli lcde, sa na-ayrplapxx leplz kcng tzrpilr na-atrkatilr nzwz-krnge. Murde sa navz-nqblqx Nzryrnrkxtr mz nzrpi-krde kx, “Bzkq rpiq kx doa vz-rbrpe, a' mz nzymne-krbzme natubz du mz nibrm leplz naesz' o nali kx nzmckzlr nzvz-rbr-krde.” ☆ <sup>2</sup> Mzli kc mz nzwrde krali mz nzoklati-krbo nimu, rngidrlvz-ngrbo mz leplz kcng tzmncng mz alwx kx natektqrlr nqm q nr drtwrdr. X mzli ka mz nzmnc-krbo lc rlru, narngidrlvz-kz-ngrpo mz leplz lcng badr leplz kc-kzng tzmncng mz alwx mzli ka. Murde mzli kc navz-ngr-mopwo, trpengr doa kx nayc mz drtwrnge nide, a' sa na-ayrplapxx leplz amrlx kcng tzvz-rbrng. <sup>3</sup> Sa na-alex da lc murde kzdung nimu leplz nzrpilr kx nzm na-aelwapx-ngrbo nznrgisc-krnge zmatq mz nzngini-krnge aposol ne Kxnmcp. X sa namclr zmatq lc

☆ **12:21** 2 Korint 2:1-4 ☆ **13:1** Lou Kcpwz 17:6; 19:15; Matiu 18:16; 1 Timoti 5:19



mz nzayrplapx-zlwz-krnge nidr. Murde trnavz-nrwx-ngrpou badr. <sup>4</sup> Mzli kc tztqlvztrngr Kxnm-cpx mz kros, opxm kx trpnzngr scde zmatq. A' mzli ka lupe mz zmatq ngr Gct. Mz nqm q lcpwz, mz nzaxvctr-krbzk bade, rpiamu kx trpnzngr scgr zmatq mzli kc tqmnc-ngrgu. A' sa namcamu kx prtr-kzpzk mz zmatq kc tqatulzml nide mz nzbzngr, mzli lc na-ayrplapxngr nimu.

<sup>5-6</sup> Naobqtitramu nabzmu. Doa kx esz' mz nimu, nakrlzle kx Jiszs mncpxm mz nabzm o trtingr. Murde nzmu kx tqlxngiti-angidrpeq Jiszs Kxnm-cpx kc tqbz-ngrde nim, nakrlz-kzq kx abtrpzme drtwrm bade mz nzyapwxtipx-krbzk nide bam. A' doa kx Jiszs trmncpxpuu mz nabzde, trnginideu kxrlxngiti angidr. <sup>7</sup> X krka'bkz mz Gct kx trpnzngr nimu kx navz-rbr mzli kc nakrlz-ngrbkz nimu. Nzkrka'-krgr lc trvzpxpuu mz nzsutikr drtwrgr leplz nzkrz-krdr zmatq ngrgr mz nzayrplapx-krgr nimu. A' nzkrka'ngr lc vzpxm mz nzsutikr drtwrgr nzale-krmu da kxtubq, kxmule-esz' leplz trnzmlru zmatq ngrgr. X mz drtwrgr, trngiu da kx myapxbz nzaelwapx-krgr zmatq ngrgr. <sup>8</sup> Murde zmatq lc trngiu dalr nzayrplapx-krgr leplz kcng tzvz-nqblqpelr Nrpa Angidr. A' zmatq lc ngi dalr nzvectr-krmgr leplz mz nzlxngiti-krdrle. <sup>9</sup> X mzli kc tqlolvz-amqngi-ngrnamu nzrlxngitingr angidr, abrtzkr kxmule-esz' zmatq ngrgr yc-kapq. Murde krka'-zvz-ngrgr kx nzrlxngiti-krmu nabr. <sup>10</sup> Dekc tqyr-ngrbo letz lc bamu mz natq kx xplr mz nzmnc-rlru-krbo bamu. Murde mzli kc nakrlz-ngrbo nimu, trsutiu drtwrnge nzayrplapx-zlwz-krnge

nimu mz zmatq kc tqkam Kxetu bange. Murde zmatq lc ngi dalr nzokatr-krnge nimu mz nztu-amqngi-krmu mz nzrlxngiti-krmu, a' trngiu dalr nzamyati-krbo drtqmu o nzatrkatikr-krnge nimu.

*Natq Ngr Nzarlz-lzbqngr*

<sup>11</sup> Mzli ka, kx mzlengeng x inwengeng, naelalz-ngrm drtwrmu Kxetu. X nzrlxngiti-krmu nabr mz nzvz-nqblq-krmu natqngeng, mz nzesz'tikr drtwrmu, x mz nzmnc-zpwx-lxblr-krmu. Murde mz nzale-krmu da lcng, Gct kc tqrkam nivz x nzmnc-zpwxngr, sa namnc mz mzlirmu. <sup>12</sup> Mz nzrmcti-lzbq-krmu, male-lxblramu mqmu mz nivz.

<sup>13</sup> Leplz ne Gct amrlx kcng tzmncng mrka Masedonia Provins, nzrpibzlr bamu kx, "Nimu la."

<sup>14</sup> Krka'-ngrne kx nivz lr Gct, x zmrlzkxmyalz ngr Kxetu rgu Jiszs Kxnzmcp, x nzodutr-lxblr-krmu badr Mqngrkxtr, nayc-zvzbz bamu.

Delape, Ninge *Pol.*

**Nzryrngrkxtr Kc Ate Rut x Sam  
The New Testament plus Ruth and Psalms is the  
Natügu language of the Solomon Islands  
Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 11 Nov 2022 from source files dated 30 Nov 2021

fb2b7f06-e254-5fb7-b59d-ee21d5d7a93f